



Tir Yimiyim

www.tirymiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymiyim@gmail.com

TAPAK 8 Yangia anidakangma : f Tir Yimiyim

Instagram tirymiyim@aolima

YouTube tir yimiyim TAPAK 10



Tanzania opposition lenir court ken o thinen; longkak aiter apu

Tokyo Olympics: Ravi Dahiya-i silver medal kokogo



VOL. XVIII NO. 293 (ADOK 293) DIMAPUR

ROGONÜ (FRIDAY)

LUROI (AUGUST) 06, 2021

₹ 5.00

Delhi High Court nung EVMs indang ken o magizük

Dimapur, Luroi/August 05 (TYO): Election nung Electronic Voting Machines (EVMs) amshiba anentsü aser ballot paper amshitsü atema Public Interest nung Write Petition ka benoka aliba Delhi High Court ajanga Mongulbarnü (August 3) agientsü, ta sangdong ka ajanga ashi.

Chief Justice D N Patel aser Justice Jyoti Singh nati ashiba agi, okatsür C R Jaya Sukin-i benokba petition ya dangari jembiba angashiba aser tamendak dak tejangja makai tai tongloksüba

nung ajemdaker benokba publicity interest litigation ka liasü.

Delhi High Court ajanga kuli agütsüba mapang, ken o benokeri aginüba ama obendang agütsütsüsa kuli tajung aser tejangja peria mali, ta ashi.

EVM dak sendakba nung Representation of People Act, 1951 indang Section 61-A nung shia aliba ama ECI aser Parliament temolung asütsüsa kuli mali, ta Court ajanga ashi.

Iba Petition ya sen 10,000 jenjang nung agieja liasü.

COVID-19 Nagaland: Nisung 118 dak putet, 87 taneptsü nguogo

Kohima, Luroi/August 5 (TYO): Brehostibarnü Nagaland nung nisung 118 dak COVID-19 tashidak putetba sülen tashidak menar ajak senteper 28,335 jungogo.

"Tanü nisung 118 dak tashidak putetogo. Tashidak putetertem ya Dimapur nungi nisung 36, Kohima 27, Zunheboto 20, Mokochung 13, Tuensang 5, Peren, Phek aser Wokha pezüzü, Kiphire aser Longleng anana 2 aser Mon nungi 1 lir," ta State Nodal Officer for Integrated Disease Surveillance Project, Dr Nyanthung Kikon-i metetdaksü.

Paisa, tashidak menar alir nisung 87 anepba osang metetdaksüogo, kong Kohima nungi 41, Dimapur nungi 19, Tuensang 10, Mon 6, Mokochung 5, Phek 2 aser Wokha nungi nisung 1 densema lir. Tanü taneptsü angurtem meyoakteper tang tashi nung nisung 25,603 taneptsü nguogo.

State nung recovery rate 90.36 percent nung lir.

Tang tashidak agi tonger nisung 1,345 lir, item rongnung nisung 211 dak tashidak keta aliba temaitsü terara sayudar, nisung 26 oxygen agidar, nisung 14 tashidak agi kanga mejungi tonger oxygen agidar, nisung 7 ventilator magi-i ICU nung lir aser nisung 5 ventilator agidar. Kasa mapang nung tashidak menar alir nisung 1,079 dak tashidak keta aliba temaitsü kecha mesayur, ta

paisa metetdaksü.

"Taoba ghonda 24 tsungda Dimapur district nung nisung ana asüba sülen state nung tashidak agi asür 581 jungogo," ta pai ashi.

Ajak senteper COVID-19 agi shiranger nisung 806 tanga state-i anirogo, ta Dr Nyanthung-i metetdaksü.

Tang tashi nung Nagaland nung COVID-19 sample 272,115 tendangogo. Sample 103,708 RT-PCR nung, TrueNat nung 68,116 aser Rapid Antigen Test ajanga sample 99,291 tendangogo, ta Dr Kikon-i ashi.

"Kasa mapang nung Nagaland nung Bodhbarnü tashi nung COVID-19 vaccines dose 781,656 nisung 626,206 nem agütsüogo," ta State Immunization Officer Dr Ritu Thurr-i ashi.

State nung vaccine agirtem rongnung yakbang nung inyakertem 60,820, healthcare professionals 15,976, arishi küm 45 temapur 187,031 aser arishi küm 18 nungi 44 tsungda alir nisung 362,397 densema lir, ta paisa metetdaksü.

Beneficiary ajak senteper 154,450 nem vaccine dose anaprongla agütsüogo. Vaccine dose anaprongla agir alirtem rongnung yakbang nung inyakertem 40,149, healthcare workers 12,552, arishi küm 45 temapur 102,393 aser arishi küm 18 nungi 44 tsungda alir 366 lir, ta Dr Thurr-i metetdaksü.

Assam Police-i agia aliba school indang NLA nung süoki ia jembia

Kohima, Luroi/August 05 (TYO): Longleng district kübok Ladigarh nung aliba school ka 2007 küm Assam Police temi agiba indang onük tang temendak 13 buba Nagaland Legislative Assembly (NLA) nung Brehostibarnü benoka jembia liasü.

Opposition MLA YM Yollow Konyak-i iba onük ya Assembly nung benoka Government Primary School Ladigarh ya kodang amenok aser tang iba school ya kechi nung ali, ta asungdanga liasü.

Sorkar indang record nung iba school ya 1972 nung amenok, ta shia lir. Iba school ya Assam Police temi agi aser tang school ya Yanlong anasa Ladigarh yimsüung tezülen khen atema yanglua yangji agir, ta Minister, PWD, Tongpang Ozukum ajanga state Assembly nung ashi.

Iba school ya Assam-i rakzük asünung, ibai kidanger state-i Nagaland nungi ali rakzükba tatishitsü tajung ka lir, ta Minister Tongpang-i ashi.

Khen amshitsü asoshi yanglua aliba school (makeshift school) nungya tang kaketshir 32 (tebur 16 aser tetsür 16) aser tesayur asem

lir, ta pai ashi.

"Ibai tebilemstü tulu lir. Ladigarh yimsüung ya 1963 nung kumtet aser sorkari 1969 küm recognize süa liasü, ta ashi.

School ya Nagaland sorkar kübok UDISE number den register süa liaka iba school ya Assam-i atsüngdok, ta paisa ashi.

Supreme Court totuyuba ka nung para-military forces, army mestüra police temi school ki agitsü makok ta shia lir, ta Nagaland Chief Minister Neiphiu Rio-i ashi.

State Assembly nung legislator ajanga iba onük benokba atema pelaba ashiba mapang, Rio-isa kechiba nüburtemi iba atema ola madoki ajem ajema alir, ta asungdanga liasü.

Chief Minister-i Assam den arütsü indang ken o balala jembiba mapang, arütsü nung aliba nüburtemi ali wazüka ayutsü asoshi saksalema shilem agitsüla, ta ashi.

O intepba dak alaka state legislative Assembly nung züngsemtemi pei teinyaktsü mapa meinyaki aru, anungji arütsü ken o angateteptsü asoshi legislator ajak lungjemmer raratsüla, ta pai ajungshia liasü.

NLA nung Nagaland-Assam arütsü indang jembia

Dimapur, Luroi/August 05 (TYO): Tang temendak 13 buba Nagaland Legislative Assembly (NLA) senden Brehostibarnü amenba mapang Nagaland-Assam arütsü ya nüburtem asoshi tongtipang rongdak ken o ka lir ta anagateta iba ken o jembiba nung shilem agiba mapang, Assam sorkar ya North Eastern states balala den arütsü tsütsü mangatetep ken o aika lir aser tawa Assam sorkar aser Mizoram sorkar tsungta raraba ya Assam sorkar indang tashiyim tasa ka ama tatishitsü sayur, ta MLA Imkong Imchen-i ashi.

Pai Nagaland indang Chief Minister dang North Eastern state indang Chief Minister ajunga den amteper sapang ka bushia aser ken o ya India Ato Kilonser dangi abentsü aser Assam sorkar indang tashiyim tasa nung teka amuoaktsü ashitsüla, ta shia liasü.

Paisa House indang Leader dang Assam sorkar den tezüngzüktep yanglua aliba ajunga asadangtsü asoshi Cabinet Sub-committee on Border Management ka tentetsü shia liasü.

Ajidang masü, tashiyim tasa balala nungi kumzüktsü aser Nagaland arütsülen tesemtem wazüka ayutsü asoshi Nagaland Armed Police force yoktsüla, ta pai ashi.

Paisa, Assam nung tenokdangba balala benokba ajanga timtem ajuruba nungi jenbuttsü mechi Foot Hill Road ya tekeratiba nung renemtsüka, ta sorkar dang ajungshia liasü.

Advisor, Horticulture and Border Affairs, Mhathung Yanthan ajanga House dang 1866 nung Assam kübok Naga Hills District yangluba sülen atalokba otsütem rasaa shia liasü.

Mangatetep aliba tesemtem nung satellite imaginary amshiba sasa jembiba mapang, mangatetep aliba tesemtem tsüngtong oa semdanga angateteptsü asoshi pai ayongzüka liasü.

Nagaland ya India nung state 16 buba akumba mapang nungi Nagaland-Assam arütsü tebilemstü ya mebetteteti arur, ta Minister, Higher Education and Tribal Affairs, Temjen Imna Along-ia ashi.

Iba dak sendakba nung Border Magistrate ya DC jenjangi ajungkettsüla, ta pai House dang ashi aser tarütsü nung mangatetep mestüra timtem majurutsü mechi mangatetep aliba tesemtemi 13th IRB yoktsüla, ta ashi.

Arütsü nung aliba outpost tem ya temolung lemtetsüsa tashi itsütsüla aser arütsülen security atema village guards (VGs) tem pelashishia agizüktsüla, ta Minister Along-isa ashi.

MLA Moatoshi Longkumer-i iba jembishinü nung shilem agiba mapang Assam den alitsü tsütsü mangatetep adokba ajanga Naga nung nungertem benoka liasü. Arütsü tebilemstü ajanga terenlok aser aluyimba tsütsü tetsükdaksü ajurur, anungji CRPF ama neutral security forces yoktsüla, ta pai ashi.

Arütsü mangatetep mechi state anaprong nung nüburtem anisungzük malir, ta Leader of Opposition, TR Zeliang-ia ashi.

Mepetmesü aser mangatetep adokaka Supreme Court-ia arütsü ken o tatem kati bener maruteter, kechiaser iba ken o nung tepenja lir, ta pai ashi.

Arütsü mangatetep tebilemstü ken o angateteptsü asoshi Nagaland aser Assam tsungta

tezüngzüktep tem yanglua lir, saka sorkar ana tsungta zülutepeba tezüngzüktep ya teindang masüba ajanga tang tashi mangatetep ya maneni ajurur südi, ta Zeliang-ia ashi.

Nagaland-Assam arütsü tebilemstü asoshi House nung August 5, 2021 nü Nagaland Legislative Assembly ajanga molungsoa pangzüng asem renem aser agizüktsü lemteta liasü. Item pangzüngji yamai alitsü:

1. Nagaland-Assam arütsü ken o ajunga asadanger ita asem tsungta osang agütsütsü asoshi House nungi Select Committee ka tentetsü lemet. Iba Select Committee nung züngsemtem yamai alitsü:
 - i. Neiphiu Rio, Chief Minister-Convenor
 - ii. Y. Patton, Deputy Chief Minister- Co-Convenor
 - iii. T.R. Zeliang, Leader of Opposition- Co-Convenor
 - iv. P. Paiwang Konyak- Member
 - v. Jacob Zhimomi- Member
 - vi. Mhathung Yanthan- Member
 - vii. Amenba Yaden- Member
 - viii. K.G. Kenye, MP, Rajya Sabha - Special Invitee
 - ix. Tokheho Yepthomi, MP, Lok Sabha - Special Invitee
 - x. Commissioner, Nagaland and Secretary i/c of Border Affairs - Secretary
2. Ken o tangatetep kati maru tashi mangatetep aliba tesemtem nung tezülubaba aser tangatetba nung status quo alitsü atema Union Home Minister dang mepishitsü.
3. Arütsü mangatetep ken o ya state sorkar anati court tezülen yimya tajung nung angateteptsü aser yangji anatsülen nungi arütsülen aliba nüburtem dendaktsütsü.

RPP-i Foothill lenmang tembanga yanglutsü ayongzük

Dimapur, Luroi/August 5 (TYO): Kohima nung party pusemertem aser tashitemetertem den sensak asema sülen Rising People's Party(RPP)-i tanü Hotel Ura nung osangbenertem den sensaksem sentong ka ayongzüka agiogo.

Lenirtem aser nüburtemi Nagaland nung aliba nüburtemi ajangshiba tebilemstütem lemsatapa liasü. Osangbenertem den sensaksema mapang tir Joel Naga aser party nung külem tenzükertemi Foothill Road project tembanga yanglutsüba dak sendakba nung osang tongtubang ka metetdaksü. RPP lenirtemi ashiba agi, parnoki iba lenmang koba ajanga Peren nung Khelma tesem aser Mon District kübok Tizit tashi sendakteptsü, iba lenmang tembanga yanglutsü atema Crowd funding program ka ayongzüktsü.

RPP-isa Manipur nung

Armstrong Pame IAS-i aachaayanga ibala mesükba project ka sen lakh 40 intoka 2012 küm, küm ka tsungda tembanga inyaktetra kechiba sorkari crore 70 (osang katet balala nung sangdongba osang) intokba sülena iba project tembanga minyakteter, ta party-i süngmanga bilemer, ta ashi. Source kati ashiba agi, sorkari iba project tembanga inyaktsü sentong mali.

Foothill Road Project yanglutsü atema mezüng 1974 küm benok aser NFHRCC-i 2013 küm nungi mapa inyak tenzük, ta ashiba den RPP lenirtemi Nagaland nung aliba nüburtem ajak dang iba project ya pei meyong ama agitsü aser ABAM-i 2020 küm sen lakh 36 tenla agüja tatishitsü tajung sayuba ajizüktsü ayongzük. Iba project ya Naga nungertem atema takok otsü ka kümdaktsütsüla.

Naga nungertem MLA temi iba project ya süoki ia magir. Parnoki süoki ia agi asüba iba project ya tang tashi nungbo tembanga lila. MLA tem ajaki iba project atema parnok indang LADF shilem 10 danga tenla agütsü asüba taoba küm 8-9 tsungda crore 80-90 mela mela bendenteter lila, ta RPP-i ashi.

Foothill Road project ya sentoka toktsüra Naga nungertem maneni Assam nungertem timtem agütsütsü aser rongsenketzung nung tenokdangba aiben ajangshitsü. NFHRCC-i taoba küm 9 tashi iba ken o mesamadaktsü bener aruba atema RPP-i parnok nem tenüngsang agütsüba den committee dang temulung matemtsü mepeshia metetdaksü.

RPP-i hopta ishika tsungda crowdfunding project indang osang tejangja agütsütsü, ta kasa sangdong ajangasa metetdaksü.

OCM-i HSLC aser HSSLC topper tem nem tetushi agütsü



Dimapur, Luroi/August 5 (TYO): Officers' Club, Mokochung (OCM)-i August 5 nü ADC (Planning) Mokochung conference Hall nung HSLC aser HSSLC Toppers (2020 & 2021) tem nem tetushi agütsüba sentong ka ayongzüka katsüogo.

Sentong nung o jembiba mapang Superintendent of Police, Mokochung, Vishal IPS-i, OCM tenüing nung kaketshirtem dang taküm nung ochishia alitsü ayongzüik. Vishal-isa kaketshirtem nungita yariba aser ajungmesoba atema tsürapur aser tesayurtem dang kanga pelaba melsatap. Paisa, sentong nung densema alirtem ajak nem maongka tajung agütsüba atema OCM dang pelaba lemsatapa liasü.

Deputy Commissioner, Mokochung, Limawabang Jamir, shibai topper tem nem senpet aser kuli kaket agüja liasü, pai kaketshirtem dang mangdang tulu ayutsü aser taküm nung nükjidong tejangja ayutsü ajungshi. Paisa, tanurtem anitetsü atema pei akokba

tajungtiba agi teyari agütsüba atema tsürapur aser tesayurtem nem tenüingsang agütsüba den parnoki teyari agütsüba ajanga tanurtem dang masü saka lokti jung ajangzüksü ta ashi.

Takok angurtem nem tetushi agütsüba sentong tajung ayongzüka atema OCM nem tenüingsang agütsüba den pai OCM züingsemtem dang maparen balala nung tongpu apur inyaker kaka akümtsü aser tarutsü nunga kaketshirtem dang lensayutsü ajungshi.

Topper tem tenüing nung Talinungsang Imchen-i (Queen Mary Higher Secondary School) o tatsüka jembiba aser Er. Tamsuwati DIO, Mokochung-i tepela ankiup o jembiba liasü. Iba sentong ya EAC (HQ), Vitulu lenisüba nung agi.

Teküboklen agüja aliba toppers (2020 & 2021) tem nem tetushi agütsüogo:

1. Imtisunep Jamir, Queen Mary Higher Secondary School Mokochung 12th Rank, Class X 2020.
2. Bivash Suki Abaidya, Queen Mary Higher Secondary School

Mokokchung, 7th Rank, Class XII (Science Stream) 2020.

3. Opanglemla Kichu, Queen Mary Higher Secondary School, Mokochung, 3rd Rank, Class XII (Arts Stream) 2020
4. Imlimenla. N Longkumer, Town Higher Secondary School, Mokochung, 9th Rank, Class XII (Arts Stream) 2020.
5. Moanola Longchar, Town Higher Secondary School, MKG, 11th Rank, Class XII (Arts Stream) 2021.
6. Limatongzuk Longkumer, Straightway Higher Secondary school, Mokochung, 11th Rank, Class XII (Arts Stream) 2021.
7. Imcharenba Atsongchanger, Queen Mary Higher Secondary School, Mokochung, 6th Rank, Class XII (Science Stream) 2021.
8. Arun Kumar Sah, Queen Mary Higher Secondary School, Mokochung, 7th Rank, Class XII, (science Stream) 2021.
9. Talinungsang Imchen, Queen Mary Higher Secondary School, Mokochung, 3rd Rank, Class X 2021.

NSCN/GPRN (R)-i Metemneo aser Biam benjung salem lemsatap

Dimapur, Luroi/August 5 (TYO): NSCN/GPRN (Reformation)-i sangdong ka ajanga 'Yimchunger aser Khamniungan' nungertem den 'Metemneo aser Biam' benjung salem lemsatapogo. Metemneo benjung ya August 4 nungi 8 tashi amunger aser Biam benjung ya August 7 nü amunger.

Metemneo benjung ya jenjang menjang aruba sülen pelatapa amunger. Benjung

mapang Yimchunger nungertemi asürtem atema sarasademtsür. Benjung ya anogo pongu amunger aser anogo pongu ya Shito, Zhinto, Zumto, Khehresuk aser Sheresuk ta lemsar amunger.

Kasa mapang nung Biam benjung ya Khamniungan nungertemi August 7 nü amunger aser benjung mapang inyakyim balala ajanga Khamniungan nunger takar

sobaliba sayur, koba tushitsü langa lir.

Item bungjemtem amungba ajanga 'Yimchungrü aser Khamniungan' nungertem lenla balala nung temaba jenjangi atutsü atema maneni inyaksü aser Naga nunger tsüingda yimjung asoshi tongpu apur inyaker kaka akümtsü imlaja ataba NSCN/GPRN (Reformation) MIP sangdong ka ajanga metetdaksü.

CECS-i Covid-19 vaccine agütsüba sentong ayonga agi



Dimapur, Luroi/August 5 (TYO): Wipro cares den longjemer Community Educational Centre Society (CECS)-i, Covid-19 vaccine dak sendakba nung tangazükba agütsüba den vaccine agütsüba sentong ka ayongzüka agiogo.

Vaccine mezüingbuba aser tanabuba dose agütsüba sentong ya "Vaccine Bring us Closer" omen nung ajemdaker Bangjak Phom Colony aser East block Burma Camp Dimapur nung agia liasü. Awareness sentong nung Colony tekolaktem, Subonenba Longkumer CECS Director,

Medical team aser kiyong nung aliba nüburtem den sentong ayongertem dena liasü.

Bangjak phom colony mendenbuba Pongtei Phom-i, nüburtem dang vaccine agütsü koda tongtibang iba indang lemsatapba den vaccine agütsü ajungshia liasü. Paisa, vaccine agiba dak sendakba nung olulu osang balala ajanga lokti manisadaksütsü ayongzüik.

Sentong nungsa Medical officer Dr. Sashi jamir-i, Covid vaccine agiba ajanga nisung ka Covid-19 tashidak kechi südir süaka memenatsü ta masü aser

SOP kanga süoki ia anidaksüla, ta ashi. Paisa, Covid vaccine agiba ya meshirang tsüingda nisung ka immunity tashi ita kümdaksütsü asoshi lir aser iba ajanga mozüki-i oa shirangba nungi jenboa toktsütsü, ta ashi.

Vaccine agütsüba sentong nung nüburtem nem dose 180 shi agütsüogo. Kasa mapang nung Community Educational Centre Society-i, Camp ayongzüka agütsü atema temelaba agütsüba dang masü saka vaccination camp atema medical staff tem yokba atema CMO Dimapur dang kanga pelaba lemsatapogo.

Kohima nung Micro-Isolation Zone amshitsü

Dimapur, Luroi/August 05 (TYO): Deputy Commissioner & Chairman DTF Kohima, Gregory Thejawelie, NCS mendenpuba süir Kohima Municipal kübok ward aser colony nungi teshimtet nübutem den Kohima District Task Force (DTF) on COVID-19 senden ka August 4, 2021 nü District Planning & Development Board indang Conference Hall, Kohima nung mena liasü.

State sorkari sangdongba ama tajungtiba nung takok ngua Micro-Isolation Zone (MIZ) amshitsü asoshi district nung kinük ajungalen nungi meranga yariteptsü nükjidong nung iba senden ya jazükba lir, ta Deputy Commissioner, Gregory-i ashi.

Nüburtem inyaksangshi aser rongsenketzüing tsütsü maparen balala nung tetsükdaksü tajemtiba agütsütsü mechi tesem tilaka isolate asütsü nükjidong nung MIZ ya yanglu, aser ibai ki ka dang asütsüa akok, ta pai ashi.

Containment Zone tem nung nüburtem senzüsempingba nokdang, social distancing yimya amshir, active surveillance tashi itshir, temolung melemteti alir ajak tendanger, puteter tem dangar nungi pila yutsür aser Covid Appropriate Behaviours amshidaksür aser nüburtem tashidak nungi kumzüka alitsü asoshi mera balala agir.

COVID-19 cases aser COVID-19 cases aliba ki züingdanga telungzüik ka nung

aliba ki tem mesüra colony/block/ khel/ward/village ka MIZ ta sangdongtsü, ta Deputy Commissioner ajanga ashi.

Iba dak sendakba nung DC ajanga ward aser colony ajak dang DTF den yaritepa ki jangjatetsü aser iba mera agütsü atema nüngdakba osangtem agütsütsüla, aji asünung dang tashidak menatapa aoba süngzü rakdangtsü, ta ashi.

AKMWP, ward aser colony balalai COVID-19 tashidak prokshia aoba azüoktsü atema tajungtiba nung yaritepa atema pelaba lemsatapba mapang, DC ajanga parnok dang district nung tensa tamajungba nungi jenbuttsü asoshi raraba nung maneni parnok teyari nüngdaksü, ta ashi.

COVID-19 wave tanabuba ano metembang aser tang iba tashidak putetyonga aruba aser iba nung lendong sendaka aliba ajanga wave tasembuba ya tebilemstü khuret tulu lir ta sayur, anungji district nung iba tashidak tendangba aser mozü agiba maparen tali ulushitsüla, ta pai ashi.

Iba senden nung CMO Kohima, Dr. Vezokholu Theyo ajanga COVID-19 tashidak tendangba yimya indang jembiba aser iba tashidak tendangtsü aser mozü agütsü kanga tongtipang, ta shia liasü.

DTF ajanga nüburtem nem rajemdaksüba sülen district nung mozü agirtem timba kumogo, ta DIO Kohima, Dr. Rupert Peseyie-ia metetdaksü liasü.

Mokokchung nung COVID-19 random testing agi



August 5 nü Mokokchung jilakübok Sewak Gate nung COVID tashidak tendangba noksa nung angur.

Dimapur, Luroi/August 5 (TYO): District Task Force, Mokochung-i, July 26 nungi August 5 nü tashi Mokochung jila nung dokan amenertem, kou mejepertem, lendi nung shishilembartem, aahyangertem aser temulungertem dak Covid-19 tashidak tendanga liasü.

Chief Medical Officer Office sangdong ka ajanga ashiba agi, iba sentong kübok nisung 597 dak tashidak tendangogo aser

item nisungtem rongnungi nisung 5 dak COVID 19 tashidak poteta liasü.

Urban Surveillance Team-i, dokan amenertem imlaba ama tashidak tendangi telungjunga maru ta ashiba den wara azüoktsü atema local dokan kiburtemi tejakdangi arua tashidak tendangtsü aser parnok dak tashidak keta ali mali jangjatsüji kanga tongtibang ta ashi.

DRDA Mon ajanga kakat tilaka saya

Dimapur, Luroi/August 05 (TYO): Jila, yimdak-yimtsüing aser Tribal area tem nung COVID-19 tashidak wara ketdangtsütsü asoshi SOP sangdongbatem meyipzüka kakat ka DRDA Mon ajanga August 5, 2021 nü saya liasü.

Konyak oshi nung meyipzüka aliba kakat ya ADC Mon, Y. Chingak Konyak, NCS ajanga Resource Centre, DRDA Mon nung saya liasü.

Iba kakat sayaba mapang Chingak ajanga DRDA Mon nem tenüingsang agütsü aser iba kakat ya ajanga nüburtem COVID-19 tashidak nungi kumzüka aliba nung yaritsü ta amanger, ta ashi.

Vaccine agütsüba sentong nung nüburtem nem dose 180 shi agütsüogo. Kasa mapang nung Community Educational Centre Society-i, Camp ayongzüka agütsü atema temelaba agütsüba dang masü saka vaccination camp atema medical staff tem yokba atema CMO Dimapur dang kanga pelaba lemsatapogo.

nung meyipzüksü totuyuba agüja liasü.


Iba kakat meyipzüka mapang inyaksangshiba ajanga pai lemsatap aser mapang tatsüka tsüingta iba mapa takok ngua inyaktetba nung shilem agirtem dang pelaba lemsatapa liasü.

"Iba booklet den külemi tongtipang poster pezü Konyak oshi nung meyipzüka liasü, aser yangji kabo mozü agiba tajangzüik indang dena lir," ta pai ashi.

State nung pei oshi nung kakat meyipzüker sayababo Mon District mezüingbuba alitsü, ta paisa ashi.

Iba sentong nung PO, DRDA, Mon, Y. Manching Konyak menden liasü aser KBCM Mon Pastor, M. Nahngom Konyak ajanga iba kakat ya meshiteta sarasademtsü aser DPO, DRDA, Mon, T. Manhom Konyak ajanga tepela ankep o jembiba liasü.

In
REMEMBRANCE
— 40TH DEATH ANNIVERSARY —



REV LONGRI AO
MAY 5, 1906 • AUGUST 6, 1981

FAMILY MEMBERS

Assam aser Mizoram nati tenangzüktepba ka yangluogo

Aizwal, Luroi/August 5 (Agencies): Brehostibarnü Aizawl nung minister jenjang nung senden ka amenba sülen Assam aser Mizoram sorkari tang state ana tsüingda arrtsü nung mangatettep adoker aliba tembangdaksütsü atema tenangzüktepba ka nung sign süogo.

Union Ministry of Home Affairs (MHA)-i jenjang agiba den jangyu medema sorkar anapronglai Assam-Mizoram arrtsü nung mangatettep adoker aliba agintsü aser teti atema telemtetba ka agintsü atema inyakteptsü mulunga agizükogo.

Senden ya Aizwal kübok Aijal Club nung agia liasü. "Assam aser Mizoram sorkari tanü Aizwal nung sensaksemba sülen tenangzüktepba ka nung sign süogo. Sorkar anapronglai tang arrtsü nung mangatettep adoker aliba agintsü aser sensaksemba ajanga teti atema telemtetba ka agintsü atema Ministry of Home Affairs inyakyim sülen anidaksü mulungtepogo," ta Mizoram CMO-i senden tembangba sülen tweet asü.

Iba senden nung Assam

sorkar tenüing nungi Cabinet ministers Atul Bora aser Ashok Singhal nati shilem agia liasü.

Mizoram nungia home minister Lalchamliaana aser tanga ketdangsürtemi iba senden nung shilem agi.

Senden indang osang agütsüba mapang Assam minister Ashok Singhal-i Twitter a j a n g a , "#AssamMizoramBorder arrtsü ken o bentetsü atema Mizoram Home Minister @Lalchamliaana12 aser tanga ketdangsürtem den kanga takok ngua sensaksemogo," ta tweet asü.

Singhal-isa, Brehostibarnü senden ya Assam chief minister Himanta Biswa Sarma aser Mizoram CM Zoramthanga nati ayongzükba sensaksem nung shilem ka liasü, ta ashi.

Külem sangdong ka ajanga, "Mizoram sorkari July 26 nü asürtem den asükhu lemsateper aser yirur alirtem takaratiba nung taneptsü angutsü imlaja atar," ta ashi.

Sorkar anapronglai arrtsü nung yimjung asoshi inyaksü mulungtepba den India sorkari neutral force yokba pelashishia

agizükogo.

"Iba dak sendakba nung state anapronglai forest aser police forces tem patrolling mesera amokbangtsü mesera tawa state ana indang police tsüingda mangatettep adokba tesemi sepai talila meyoktsü lemtetogo," ta kasa sangdong ajanga metetdaksü.

Assam aser Mizoram arrtsü nung aliba tesemtem rongnung Assam kübok Karimganj, Hailakandi aser Cachar district aser Mizoram kübok Mamit aser Kolasib districts densema lir.

Assam aser Mizoram sorkar tenüing nung shilem agiba lenirtemi Assam aser Mizoram nung alirtem aser talisa arrtsü nung alirtem yimjung aser tesunep nung alitsü atema takokba tashi jenjang tapet agintsü mulungtepogo.

Iba tenangzüktepba nung Assam agriculture minister Atul Bora, Mizoram home minister Lalchamliaana, Assam commissioner & secretary, border protection & development, GD Tripathi aser Mizoram home secretary Vanlalngathska nungeri sign asü.

Tripura: TBSE-i board tatidang result asadangshitsü

Agartala, Luroi/August 5 (Agencies): Tripura Board of Secondary Education (TBSE)-i Secondary (Class 10) aser Higher Secondary (Class 12) tatidang result sangdongba sülen anogo pezü lir Tripura sorkari result asadangshitsü tetuyuba agütsüogo. Taküm tatidang nung tamakok angurtemi longkak aitba sülen iba jenjang agintsü tuyuogo.

Brehostibarnü osangbenertem den sensaksemba mapang education minister Ratan Lal Nath-i, school kar nung kaketshirtem shirnok tatidang result agi temlung masü lir, parnok board-i asadangshitsü, ta ashi.

Paisa, secondary aser higher secondary results sangdongba sülen toba anogo ishika tsüingda tebilemstü adoker aliba ya teti atema bentetsü, ta ashi.

Tatidang result sangdongba sülen NSUI state vice-president Samrat Roy-i anir longkak aitba ajanga Tripur mesüingjemeti lir. "School ketdangsürtemi examinees tem aika yokogo. Item number dak ajemdaker experts' committee kati secondary aser higher secondary tatidang atema candidate temasadangogo. Board-i iba dak ajemdaker result sangdongogo. Ajisüaka result sangdongba sülen state kübok

tesem kar nung result dak temlung masür," ta Nath-i ashi.

Paisa, education department-i board dang aibelen jangjatsü atema results asadangshitsü tetuyuba agütsüogo.

Education minister-isa, Tripura Board of Secondary Education-i experts' committee den senden ka ayonga amentsü ta shiogo.

"School ketdangsürtem den tongtepratepa tebilemstü bentetsü atema inyaksü. Tatidang result asadangshiba inyakyim ya hopta kabosa agintsü," ta Nath-i ashi.

Education minister-i, tatidang result agi temlung masürtem dang tatidang agütsüshitsü mepeshia metetdaksüogo.

TBSE ketdangsür kati ashiba agi, school tatidang nung minimum 10 marks mangur kaketshirtemia longkak ai tenzükogo. Kaketshirtem aikati parnok paper junga masadangi tamakok ngudaksü ta ashir.

COVID-19 dak sendakba nung tenokdangba agütsür liaka kaketshirtemi Mongolbar aser Bodhbarnü yimtung nung longkak aitba sentong nung shilem agiogo. Parnok mesüzüksü merandangogo saka meyiper parnok mazüokteti aküm. Ajisüaka police-i kanga aremzüka tensa azüokogo.

Assam : Telungpur telok kati ketdangsürtem pur aotsü sentong yangludat

Dibrugarh, Luroi/August 5 (Agencies): Assam nung itangitertemi telungpur telok kati Independence Day matong tsüingda timtem bener arutsütsü sentong yanglua aliba indang osang agütsüba sülen Security forces kanga kümshio.

Source balala ajanga ashiba agi, telungpur telok kati Assam nung totzü company mesera süngolu kar nungi ketdangsürtem pua bener aotsü sentong yangludat ta itangitertemi metetdaksüogo.

Temetetsükaji tawa ULFA-I puri Arunachal Pradesh aser Assam kübok private oil company ka aser ONGC nung inyaker ketdangsür kar pua benerogo.

Assam kübok Dibrugarh district nung Brehostibarnü BCPL Guest House nung high-level security senden ka menogo, kong Independence Day matong tsüingda upper

Assam nung temzüing ozüing tensa asatopogo.

Iba senden nung Assam DGP - Bhaskar Jyoti Mahanta, IGP (Law and Order) Arunachal Pradesh Police - Chuku Apa, upper Assam aser Arunachal anüdoklen district ajak nungi Superintendent of Police, Army, Assam Rifles aser Central Armed Police Forces (CAPF) ketdangsürtem aser intelligence agency balala nungi ketdangsürtemi shilem agia liasü.

Iba senden nung Independence Day matong tsüingda iba tesem nung security dak sendakba ken o tem benoka sensak asem.

Senden nung sensaksemb indang ketdangsürtemi memetdaksü saka source kati ashiba agi, ULFA-I aser NSCN telungpur telok balalai lendong bener arutsütsü ana nung aliba indang senden nung sensaksemba liasü.

Centre-i multidisciplinary team ka Manipur-i yok

Guwahati, Luroi/August 5 (Agencies): Manipur nung Covid-19 tashidak menar tali kuma aoba dak sendakba nung Centre-i multidisciplinary team ka yokogo.

Union Health Minister Mansukh Mandaviya-i, iba team yagi state nung tang tashidak azioktsü atema jenjang balala agi aliba nung teyari agütsütsü ta ashi.

Taoba hopta ishika Manipur kübok tesem aika nung Covid-19 tashidak menar tali kuma aoba metetdaksüogo.

Manipur kübok Chandel district nung June 28 nü tashidak menar 8 dang aliba hopta pezü tsüingda July 34 tashi nungbo 34 ajung.

Tashidak menar kanga aikabo masü saka iba ajanga tazüokba makai growth rate tali akümba sayur, koba lendong lir.

Taoba hopta data ajanga covid tashidak nisung aika dak menaba district 22 nungi 13 bo Meghalaya, Manipur, Arunachal Pradesh, Tripura aser Assam nung aliba sayuogo, ta Union Ministry of Health and Family Welfare source kati ashi.

Health minister-i Mongolbarnü ashiba agi, Manipur, Mizoram, Nagaland, Arunachal Pradesh aser Meghalaya densema state aser UT 12 nungi August 2 nü hopta tatemi hopta shia tashidak potetba shilem 10 dak tema liasü.

Kasa mapang nung Kerala (10 districts), Maharashtra (3), Manipur (2), Arunachal Pradesh, Meghalaya aser Mizoram (1 each) nung taoba hopta pezü tsüingda anogoshia tashidak timba timba akümba osang agütsüogo, ta health ministry-isa ashi.



TIR YIMYIM YIMOBILEM (EDITORIAL)

DIMAPUR ROGONÜ, LUROI (AUGUST) 06, 2021

Asenok ajak alena lir

Asenok Naga nungertemi tang India den yimjung mapang lapoka yur, Naga yimten ken o jembu tenzükba ya, kin balala ana tsüngda yimten ken o jembir ama agir aser aji shitak lir, kechiyong tashiyim agi aniokba agi makok dang ashi, Naga nungertem ya India nunger shilo masü, anungji kin balaka, saka koda masü, tashi agi makok India telongjem kübok medennüseti adenertem rongnung Naga nungertema ka lir. Anungji, asenok ajak ya India temzüng agi alena lir. Aji oda, asenoksasa tuluka amato bilema Naga nunger temeten atema jembiyonga, asenok ajak India temzüng kübok election nung shilem agir aser election nung tokteper aser tadoker shiai India temzüng nung ajemdaker Tsüngrem tenüng nung linük temzüng kübok tashi angaa alitsü aser linük telongjem kümzuka ayutsü asoshi yimjak nung tenangzükba agir. Item jagi kodaser Naga yimten temeten indang tekolak angüma atur jembitettsü ? Item rongnungji asenok ajak dena lir. Ano, külen linük tenzükertem jenjang repringdangra, parnokbo nübortem dang nungi kanga agia tesashiba yongrak agi alena lir. Naga nunger yimten nüchiso atema inyakertem telok shia pei pei tesepe yanglur alitsü atema India government-i tesem kar shimteta yuja lir, anungji linük tenzükertem telok ajak item tesemtemji mesemtemta alir. Item tesem dangji 'designated camps' ta ajar. Iba designated camp, tetezü India government-i shimteta yutsüba tesemtem nungji, linük tenzükertem ozüng agi alena lir. Ano, linük tenzükertem tanishirtembo India sepaitemi dang anüker aser parnokki dang meiner Naga yimten nungdak jajar. Itemji kodang bilemdangdir, designated camps nung aliba aser India sepaitem nem nükdakja India government-i lemzüksüba kidang alibaji "house arrest" asüba den kasa lir. Atangji, India-ibo Naga yimten ken o ya yaküm küm October nung tembanga jembioigo ta ashir saka Naga nunger linük tenzükertem rongnung NSCN-IM teloki Naga nunger wako aser temzüng medenibo Naga yimten tebilemstsü ken o telatetba kati marutettsü ta nokdaker. Idakji tsükdaka yur tang tashi Naga yimten ken o tembanga mejembitetter. Iba tensa tia ya jungjunga bilemdangra, India tsütsübo India government-i ashiba amato, ken o tembanger asütsüba akok, kechiyong tang amai asenok ajak "House arrest" nung aliba tia ya India nunger asoshiba takok tuluka asütsü. Nübortem ajak India election nung shilem agir aser parnokki shimteta purtemi küm nung anabenbo India wako nem salem agüja Indian Independence aser Republic Day osang (speech) azünger. Ano, Naga nunger linük tenzükertem ajak India government-i lemzüksüba tesem aser kidang alir aser India sepaitem anir Naga yimten ken o jembilen jajibaji India asoshi kecha timtem takoksa aser shisabolutsü mali, anungji parnok asoshibo yamai dang lia küm pongo shia election shitak agitsü aser küm shia Indian Independence aser Republic Day linük ajak den külemi Naga lima nunga akhümketa amongtsü ta süra, India asoshi Naga yimten tebilemstsü kecha mali ta sayur. Joko, India atema Naga nunger tebilemstsü yimten temeten dak aketba tebilemstsü masü saka tashiyim agi rakzükertemba tebilemstsü amaing ka küma odagi. Ibaji asenoki masüba ta ashitsüba masü, anogo shia tesem ka nung mesüba ka nungbo India sepaitemi Naga nunger linük tenzükertem telok ka mesüba ka nungibo tashiyim agi sen saruya aliba apuba osang angashir. Itemji anogo shia osangtsüsang nung adokdang, alima tsüngdang Naga nunger nümedangtetter. Aji oda tashiyim agi sen saruya lia, India sepaitemi NSCN pur ka apua ta mesüba NNC pur ka apua ta sangdongba jagi, India-i NSCN aser NNC teloktemji yimten nüchiso bushir telok masü saka ashir auer telokang ka amai züngshiba asenoki angatetter. Naga nunger tsütsü asenok mashimalu, ambangyim aser angateter ser nung mangatet ama inyakba agi takoksa timtem ajurubaji aji tatem masü, saka Naga nungertemi pei lima aser pei nübortem asoshi timtem maremer, iba jagi 'house arrest' jenjang nung ayongayonga libar, idak nung jagi madokner aser telok ka nung junga anisüngzük aser tajangzük mengura, telok ka nungi kati oadoker, ta asenok Naga nungertem ya tamongdak ka mamong yimten masü saka alima rongsenang temeimba kümogo. Asenok dak joko taaktsü maket, anungji ano alima tsüngdang maksü tuluba majangzük dang, tuluka tilaka ta masü, ajaki mulungba ka nung yaktasa Naga yimten jenjang tasen ka latettsüba.

OLEMSABANG

Arok külemi item tasüngdangbatem telangzüba bushidi

~ L. Kika Pongener

(Yashi adok nungi...)

- Q.No.9. Aotsü-Aor kidang teyariteper/kilir ayuba ya anepalua/meima ayur asü mejungi ayur ???
 Ans:- Arunachal nunger aser Naga nunger anutoklen alir kintemi mapang kabo Ao kinji Tsüngrem ama bilema liasü. Saka kodang par nisung asen Aor kidang yaritepa alitsü/School züngdaksütsü anir arua lidaktsü, kar dak alaka aikati mejungi benshiba ajangshia lir. Missionary kati Anunachal nunger chanu ka Impur nung Bible züngdaksütsü anir aruba, Aor tular ka kidang par nem yaria züngdaksüsuba toktsü nung, Aor Saheb-ba jagi yi (Whisky) alitsü tenyaba, idangji Arunachal nungbaji kanga aoksa !!! Aser par yimdaki sodi aodang par yimer dang, Ao kin-to asenoki bilemba ama masü, asen den kecha tepila malia no...ta sangdongba otsü lir. Ano Aotsür-Aor tular-takar kibong kati Mission mapa asoshi rongsen aika tenlar, saka par kidang kilirbo kanga mejungi ayuba ajangshia/ngua lir.
- Q.No.10. Kechiba Naga nungeri office nung tsümartem ama nendak-nendaka 'Regular' sua meinyaker ???
 Ans:- Naga nungerji lokti-tentet aika nung atongsema lir, ajioda, telok-tenji metting-sitting, benjong-bentsü, mungdang-mongji, sentep-senji, nubotsük etc. yamala mapa nung anogo teimba ka senzüdang, office mapa nung nendak-nendaka 'Regular' sua meinyakteter, pei mapa nung tamakok aludaktsür, oda staff karbo pa/la itasen agia kibong/taküm mesuba mapaji talakba sudaktsür, office-i modangi itasen dang agizükba sorkar mapa inyaker karbo lir.
- No.11. Kechi kodaser Naga nunger kibongtem ya tali sensak adener ???
 Ans:- Lokti-tentet onsara tenzükba agi tali sensak-adener, kechiba sura lokti-tentet shiagi saru molok aser nubotsük dena lir. Anungji yimden aser arogo ana dakji alaka, kokrabangla tanga tanungba lokti-tentettem yabo mayuba-ang kanga agi tajungba sula. Mesura oda kanga tongtipang masüba lokti-tentet karbo mayuba/anenadokba-ang tajungba asütsü. Tsümar-tembo küm tepiyong nung Diwali/Durga Puja/Edul-Fitra etc. yamala nung khen saru mejimenu kar saruba dak alaka, lokti-tentet/saru-saji kecha maka, ibajagi parnok hajirawalla ka dang suaka tim-metemi liteter.
- No.12. Kechiba Naga nunger aikati local nisung 'Mistri' masü tsümar 'Mistri' dang bushir/anir ???
 Ans:- Asen Naga nunger Mistri-tem aikati hajira sen tsümar dang nungi tali meshir, aser ano mapabo kibur taginuba ama masü karibo pei mulungba ama, oda mapa mela-mela atemtsü asa-a dang inyakdi asür. Tsümar atemabo sorochioktsü tebilemstsü mali, saka local nisung atemabo shi/ango/sungo mayongtsü tajung mechidaktsüra nungsen jembir, ibajagi tsümar 'Mistri' dang aginur/anir asütsü.
- No.13. Kechiba Naga nunger aikati local nisungi lapokba Dokan nung meshishinur ???
 Ans:- Naga nunger ya akümstsüba kanga aginuba shilo ka lir. Anungji tsümar-temi Naga nunger jakla yimya lazükertem, kodang Naga nunger kar Dokan anasa sua odir, 'Yimpezük' nisung ka danga saheb/mim-saheb ta ajatsü. Ano uncle, aunty, bai, boini, ahibi amar laka Dokan-di saman mahal-mahal ase...ta o tanang/osu tanup agi akümstsüba jembitsü. Osettsüset/aonsotsü aseni aginuba ama shimdaksür. Tajung o tamajung balala shimdang jenjang balala agi ayoker. Ajisuaka, Naga nunger dak tangar dang akümstsüba jembishinutsü aika dakbo sempet keta mali. Aji oda, shishilempaba mapa nung balaka, nisung ajak den kecha tebandang meli-i o tanang/osu tanup agi, oda marunui oya-a aliba-a meyiper arutsüsa jembishinutsü kanga tongtipang. Yamaji inyaktetra kin ajaki asen Dokan nung shishinutsü.
- No.14. Kechiba Aor lanurtemi pei oshi jembitsü/azüngtsü aaker/numa-matanger ???
 Ans :- Aotsür-Aor dak tangar jilo benshiba, tangar kin subo-solemstsü suboba, tangar kin oshi jembibaji konang amai bilemba shisatsü keta lir. Küm ishika suiogo Aor yimtsüng ka nung lanur kar Dimapur nung küm ana-ase ka lir pei yimdaki shilang, aser parnok yimdak kima-yimdong nung senzüdang 'Nagamese' oshi jembibaji jenjang tulu-ka tongtet amai yimdakilir dangji asüküma/tiaksanga jembia sayu, aser yimdakilir lanurtem jagia parnokki 'Kodaker oshi' ka jembir amai kanga nukshiseta repringba otsü lir. Tanu Aor lanurtem aikati Ao Milen & Tir Yimyim azüngbaji 'Backward' amai bilemer. Ajisuaka, Aor chanu kati pei tetsü oshi mejembitetba-jiang maaksu tulu ta metettsüba.
- No.15. Kechiba asen Naga nunger kaketshirtemi UPSC/NPSC Exam agütsütsü mejangrar ???
 Ans:- Naga nunger lanurtem ajunga tokolok shisatsü nung UPSC/NPSC Exam-ji kanga junga agütsüyongjia, sen magütsüba takok mangutsü...!!! Anungji sensaker/tilarbo UPSC/NPSC Exam agütsütsü nungdak mali ta...Iba tangatetba shisatsü jagi Naga nunger lanurtem tokolok shisatsü ajak sunga lir (Brain-Washed). Ajisuaka, shirnoki pei azüngba nung shitakba/chichiba shisaliok jenjang (Degree) ngua/tonga zünger, aser lesson meranga bushir UPSC/NPSC Exam agütsür, parnokjibo sen magütsüyongjia IAS/IPS/IFS/IFoS/NCS/NSS/Allied Services, yamala mapa tajung ngur aliba lanurtem aika ajangshia/meteta lir. Anungji lanurtemi temulung ajema mekümi temulung ulushir meranga zünger/meranga lesson bushir UPSC/NPSC/Competative Exam agütsütsü ajungshir.
- No.16. Kechiba asen Aotsür-Aor-i alu ayimba mapa toktsür/alu mayimer ???
 Ans:- Tekong-lu/tsük-lu ayimba agi kibong tepok masüngba agi alu ayimtsü mejangrar asü (?) Aji oda, tsük-lu ayimba agi tepok mesungra, aji toktsür tanga tsünusempongtsü-lu kar ayimtsüba. Tia maka asen lima nung tzü-lu ayimtsü tesem ajak nungbo lisa agi memelar. Aor yimtsüng ishikati ali den apet tsünusenpongtsü-lu ayimba agi, pei kibong küm piyong tepok sunga chiyunga litettsüba züsentedba, aser tangalen-ia terarabo yoktettsüba züsentedba ngua temulung chia repringer. Mokochung jila bazar nung local Mersu, Azüngken, Bengana, Lasüng, Züngyi, Mongmong-tu, Nuoshi etc. yamala aonsotsü aika ayokba-to asen Aor yimtsüng ishikati züsentedba lir, aser Mokochung jila nung dang masü Dimapur tashi bener alua ayoker. Ni shinubaji tsük-lu jisa mayimyongjia kechi tsünusenpongtsü züsentedba, iba jagi sen akümstsü aser sen lira nungdakba ajak alitettsü. Anungji joko tekong nung tsük-lu ayimba yayim ya toktsür asen lima ali nung kechi apet iba tsünusenpongtsü-lu meranga ayimtsü tenzükdi ta ajungshir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Missouri nung Pastor kati züngsem ka nem tezüngjang tenla agütsü



Jeremy Whitman (abelen) aser Park Grove Christian Arogo nung pastor, Jack Coultas na noksa nung angur.

August 05, 2021: Taküm küm tetenzüklen Missouri (United States) nung pastor kati par Arogo nung züngsem ka nem tezüngjang ka tenla agütsüba sülen pai Khristantem dang Yisu Khristai meimba ama asenokia adianutem meimtsüla, ta ajungshi.

Pastor, Jack Coultas ya Deepwater nung aliba Park Grove Christian Arogo nung pastor inyaker, aser pai par Arogo nung züngsem aser diabetes agi shiranger, arrshi küm 36, Jeremy Whitman nem tezüngjang ka tenla agütsü.

Osangbener den jembidang pastor-i, "Ni mapa agi sayua pa yarinüa liasü. Jeremy tezüngjang agi mapa meinyakba sülen kü melungjang nung khuret tuluka liasü," ta metetdaksü.

Tsüngremi Whitman nem kü tezüngjang ka tenla agütsüsü atema ni kanga ajungshia liasü, ta pastor Coultas-isa metetdaksü.

"Kü melungjang nung Lai o 1 Yohan 3:16-17 ajanga kü den jembia liasü. Temeim ajanga Pai Pa taküm asenok nem tenla agütsü, anungji asenokia asen adianutem nem taküm tenla agütsüsüla. Rongsen liaka nüngdakba adianu meyarira, komaser pa dak Tsüngrem temeim alitsü?" ta pastor-i ashi.

Pai kanga sarasadema liasü aser tesüsa pai Whitman yaria tezüngjang ka tenla agütsüsü melungteta liasü.

"Ni iba Lai tekong shisadangba mapang nung ni ya apitet- Khristai Pa taküm asenok nem agütsü, anungji ni Jeremy yaritsüla, ta melungtet," ta pai ashi.

Iba sülen pastor tezüngjangji Whitman den apettsü asü mapettsüar ibaji metettsü atema tendang. Pa tezüngjangji Jeremy mang nung apettsü ta tendangteta liasü.

Whitham aser Coultas naprongla Saint Luke's Hospital nung operation takok ngua agi.

"Ni Jeremy nem kü indang tezüngjang tajungba tenla agütsü," ta pastor-i asayamenüa ashi.

"Jeremy dak kü tezüngjang inokba sülen idangyongjisa tezüngjang agi mapa inyak tenzüka liasü. küm ana tashi pa dialysis agia kidang dang monga liasü. Tangbo pai senzüteter aser akhi ama liteter," ta pastor-i metetdaksü.

Coultas-i Khristantem danga nüngdakbapurtem yaritsü ajungshi.

"Ni Khristantem dang Khristai Kangki nung taküm tenla agütsüba shisadangdaksüner. Asenoki Pa temeim metettsü atema Pai asen menen yong taküm tenla agütsü. Ni Khristantem dang Khristai asenok meimba ama asenokia adianutem meimtsü ajungshir," ta pastor-i ayongzük.

Khristai asenok dang melamela meimba tatishitsü mesayu, ajisüaka lendong liaka meimba tatishitsü sayu, ta paisa shisem.

Radio ajanga North Korea nung Khrista osangtajung proker

August 05, 2021: Tang alima nung Khristantem alitsü tamajungtiba linükji North Korea lir, ajisüaka iba linük nung tang radio ajanga Khrista osangtajung prok tenzüko.

Kim'er kibong yimsüsüba kübok North Korea nung tamangba yimsü balala sadoka amangtsü atema sensotem nem temeden magütsür, talisa Khristan yimsü ya linük atema tsükchir ama züngshir, ibayongji North Korea nung Khristantemi kanga mimshia dang Tsüngrem külemer.

Iba linük nung Khristantem aika pua lir aser aika tepseta indokogo.

North Korea nung mimshia aliba Khristantem tenzüksü aser Khrista osangtajung proktsü atema International Christian Concern (ICC)-i South Korea yimtiba, Seoul nung aliba Free North Korea Radio (FNKR) den senteper anogo shia radio ajanga Khrista osangtajung proker.

Tang FNKR-i anogo shia radio ajanga North Korea nung den Khrista osangtajung lemsatepa arudar.

FNKR-i anepdang aser aonung shia minute 30 dak tema Tsüngrem temeim aser Khrista osangtajung lemsatepba sentong balala yoker. Item program rongnung Lai azüngba, South Korea nung pastor kati sayutsüngiba, Christian radio drama, Richard Wurmbrand-i züluba kaket "Tortured for Christ" azüngba aser osangtajung kentem yokba densema lir.

North Korea nung tamangba yimsü nung ajemdaker reshikangshiba jenjang ano tang tamajungba akümba mapang nung iba ama radio program ya kanga nüngdaka liasü.

Taküm April ita nung prokshiba North Korea nung official document ka ajanga ashiba agi, "Tang South Korea

as er United States nati kaket tila lemtsüba aser radio broadcast ajanga North Korea nung melungjang menentsüdar. Parnoki Tsüngrem dak amangtsü atema olulu proker."

North Korea toktsür ajener kati ashiba agi, "Tang North Korea nung alirtemi (Kim) yimsüsüba anema nokdakner. Linük nung melung masü tulu lir. Kodang North Korea nung South Korea-i arudir parnoki North Korea nung alitsü majungba jangjar. Kim yimsüsüba anentsüsü atema onoki maneni raratsü, anungji onok pusemdaksüner," ta metetdaksa liasü.

"Yimlibilema mimshia aliba Khristantem atema sarasademjang aser FNKR ministry atema sarasademjang. Radio ajanga Tsüngremi North Korea nung den jembitsü aser tang aliba yimsüsüba atsüündoktsü atema sarasademjang," ta ICC-i mepishia metetdaksü.

ANOGO ABEN TSÜNGREM DEN

Pai Abensatsütsü

" Kechiyong shiba nenok dak mapa tajung tenzüka, pai Yisu Khrista anogo tashi ajisa abensatsütsü ta ni amanger." Filipi 1:6

Tanur asü dang atenba English ken ka asenok aikati bilemtettsü südi-

"Pai ni tang tashi yanglushidar Ni tajungtuba akümtsüba atema pai hapta ka nung dang ita aser petinutem yanglu Paji koda temeim aser tatasa aliba Tsüngrem Kechiyong Paik ü dak tang tashi mapa inyakdar."

Asenok tanü tashi shinga tabensa mali. Saka Pai asenok senzüka meyutsüi, tanü tashi asenok dak temelenshi kechi nungdaker itemji pai reprangshia asenok yanglushitsür. Pauli Filipi nung ashi amaji, tetenzük nung Tsüngrem asenok 'tajung' yanglu koba temeneni raksatsü. Pai tenzüka mapa kaji tatem tashi, tabensa maküm tashi, pai mapa inyaksü ta ashir.

Asen dak kechi agi tabensaba mekümdaksür, mesüra tobur mejungdaksür ibaki, Teyanglusangi maneni jungjunga kümdaksütsü. Asen dang Pa nem bendanga, temulung lema atar matar ta dang ati!

SARASADEM:

Poteper na, O kibuba, nai ni yanglushijangma. Amen

Madhya Pradesh nung Hindu nungeri pastor ka dak azük



Pastor Bharat hospital nung amongba noksa nung angur.

August 05, 2021: India kübok Madhya Pradesh nung Hindu yimsü alia amangertemi pastor ka dak kanga mejungi azük; pastor-i tribal nisungtem kangshia Khristan yimsü dangi meypdaksür, ta pastor nem tai tonglokja pa dak azük.

Tichkiya nungi Pastor, Bharat'er kidang pa leniba nung Khristantem sarasadem tagidak mapang nung Hindu yimsü alia amanger telok ka aruba sülen pa dak azük.

Pastor Bharat-i sensaker tribal nisungtem mesüzüker aser Khristan yimsü dangi meypdaksür, ta Hindu nung jagi pa nem tai tongloktsü. Parnok tsüngda o langtepba sülen Hindu nung jagi pastor dak mejungi azük aser pastor meyong prayer center raksatsü.

Osangbenertem den jembidang Global Council of

Indian Christians Tir, Sajan K. George-i, "Pa [Pastor Bharat] dak Khrista osangtajung dang liasü, aser pai jembiba o anganer ajak den pai iba osangtajungji lemsatepa liasü, ibayongji pa anema inyak," ta ametdaksü.

"Tia maka India kübok state aika nung Pentecostal Khristantem anema inyakba kanga bulua kümogo," ta George-isa metetdaksü.

Taküm January ita nung Madhya Pradesh state sorkari anti-conversion ozüng tasen benokba sülen Hindu yimsü alia amangertemi iba ozüng nungi maongka agia Khristantem anema inyaker.

State nung iba ozüng benokba sülen January nungi June ita tashi nung Madhya Pradesh nung nung Khristantem anema inyakba tatalokba 48 liasü.

OLONG PAITEP # 5897

	1		2			3		4		5
6								7		
					8		9			
			10							
11										
				12						
13		14		15						16
17								18		

TIPILEN		LANGTSÜNGLEN	
1. Inyaker ajangtetba	- (3)	1. Meshidak	- (3)
3. Bangsemo adokdak	- (5)	2. Tanaben soshir	- (7)
6. Shitak mesüi inyak	- (7)	3. Iba anogo	- (4)
7. Ya mimong nung angur	- (3)	4. Meshi	- (3)
9. Reprangzük	- (4)	5. Yagi mi tsükloker	- (9)
10. Tasola	- (5)	6. Shi tapu ka	- (9)
11. S _ _ _ _	- (4)	8. Yagi ayimer saka ozü masü	- (3)
13. Yagi ajak ashiochtsür	- (3)	9. Ajokba shiruru ka	- (7)
15. Ki aokba oset	- (7)	12. Inyaktet	- (4)
17. Ak shi nung inokba tasen	- (5)	14. _ _ _ hi	- (3)
18. Ishika	- (3)	16. Akümüli nungi pilar	- (3)

OLONG PAITEP # 5896 TELANGZÜBA

TIPILEN :		LANGTSÜNGLEN :	
1. Telok, 4. Aluru, 6. Ozüng, 8. Emk,		1. Tenükjang, 2. Luden, 3. Kiochtsü,	
9. Kin, 10. Teti, 12. Süir, 13. Jen,		5. Lenti, 7. Tajangzük, 11. teronem,	
14. Ola, 16. Talak, 17. Mazük.		12. Sempa, 13. Jahaz.	



ALOKBA AONUNG KIDANGI ARUDANG ENGLISH DANG JEMBIA ARUR

Jala : Oba...Na school class-'A'-a mazüng ta teti ashir... Saka na aonung kidangi arudangbo English dang jembia arur...Anungji na English oshi ya kechi nung angazükba jembir...??? Aser nai jembiba English tetezü-jia meteter jembir asü memeteti jembir...???

Alokba : Ayyye...Yi ajemdak yi agi tera sasa pelaa meseper-bo tapu-tip ajak nungi English dang adoker aja...Surabang obalai komasa jembia arur-aka...???

Jala : Darling...Darling...I'm going...I'm going...tasa jembia arur... Na kidangi arurba sernung...ashiko medemertemi ni taor-a ta ashiba aji angazüker jembir asütsü... Ano onok ajak mejangseper shinga ola madoker sernung... Shut up your mouth tasa jembir...Ano na yi agi meseper yia-matarba dang ashi onok ajak nuji dang sernung...You non-sense...You foolish...tasa jembir...Onok kiyonger dang kanga aakseter'ar taonung nungibo ola madoki tang arung no.

~ Lilir : L.Kika Pongener.

AO OSHI ANGAZÜKDAK:
TANÜ ANGAZÜKTSÜBA OJANG

Kiset
 (n) kidang metsüba shirurudem (domestic animals)
 * Kidang **kiset** shiruru metsüba agi sen aika ajangzüksü.

Kisüng
 (n) kija, ka dang, shinga mali (alone)
 * Anogo shia kü **kisüng** mapa inyaker.

NAI-A YA METETTER MA?

NE STATE KÜPOK JULY 30, 2021 TASHI NUNG
COVID-19 MOZÜ AGIRTEM YAMAI :

State	Population (2011 census)	1st dose	2nd dose
Arunachal Pradesh	13,83,727	6,71,928	1,74,567
Assam	3,12,05,576	87,53,397	19,29,881
Manipur	25,70,390	11,12,096	2,05,543
Meghalaya	29,66,889	8,90,842	1,98,439
Mizoram	10,97,206	6,43,821	1,96,953
Nagaland	19,78,502	6,17,214	1,49,233
Sikkim	6,10,577	4,91,205	1,48,120
Tripura	36,73,917	23,75,328	7,85,291

(Source : Internet)

TANÜBO NAI LANGZÜANG

Q. Koba küm Bharat Bill Payment System ngutet?
 A.2011 B.2013 C.2015 D.2017

_____ (Taruba adok nung onoki langzüksü)

YASHI ADOK TELANGZÜBA : Cyrus Poonawalla

SUDOKU # 5937 TELANGZÜBA # 5936

				4		9			8	2	1	3	5	9	6	7	4
		7						8	7	5	3	4	8	6	2	9	1
		3						6	9	6	4	7	2	1	8	3	5
	1		8	2		7			3	1	7	8	6	2	5	4	9
5						3		2	4	8	2	5	9	7	1	6	3
4		2		7	6			1	5	9	6	1	4	3	7	8	2
7	2	4		3		8	1	5	6	4	9	2	1	8	3	5	7
9	6			1			4	3	2	3	5	6	7	4	9	1	8
				5	2	6			1	7	8	9	3	5	4	2	6

OJANG LUTEP # 5482

- ARTETENLI :
- GSLUMUNOA :
- ÜTSAGÜ :
- NGJYOIA :
- HIRTAMS :
- ATEK :
- ENEMNA :
- RALI :
- AKAJ :
- AOMAJK :

OJANG LUTEP TELANGZÜBA # 5481

PEI AJUNG DANG MEPILEMI KÜLEM INYAKERTEM AJAK ATEMA BILEMA INYAKTSÜLA

TAN HOPTA ATEMA - KOMA SÜLA ?

Q. Mizoram aser Assam arrtsülen atalokba ama Nagaland aser Assam Police na ta arrtsü raktepa khatempa nunga koma süla?



August 05, 2021 nü Uttar Pradesh kübok Prayagraj nung aliba Ganga ayong nung tzü kanga metsünga ayimba ajanga ayongküm anasa aliba kibong ka meyong ki raksar aliba noksa nung angur.

Pegasus: Media osangji shidak süra iba yabo aibelen tulu: SC

New Delhi, August 05 (Agencies): India nung Pegasus spyware amshia itdangitba ken o bushisüngdangtsü atema temepishiba ken o aika benoka liasü, aser Brihostibarnü item ken o angadanga mapang nung Supreme Court-i, nisungtem anema itdangitsü asoshi Centre sorkari Israel nung software Pegasus amshir, ta prokba osangtemji shidak süra ibajibo aibelen tulu, ta metetdaksü.

Chief Justice of India, NV Ramana aser Justice Surya Kant nati akümba bench-i item ken o angadanga liasü. Ajsüüka Bench-i temepishiba ken o benokertem dang, itdangitba ajanga takoksa angurtemi kechiba ken o mebenok?, ta asüngdang.

Bench-i, "Onoki tasüngdangba kar asüngdang. Osangkakettem nung tai tonglokja alibaji shidak süra, atangji iba jibo aibelen tulu. Temepishiba ken o timbaka bendanger osangkakettem nung ajemdaker benok. Iba ken o bushisüngdangtsü atema onok nem kuli kar agütsütetsü asü?" ta asüngdang.

Court kati ketdangsüa India nung Pegasus ken o bushisüngdangtsü atema temepishiba ken o aika Supreme Court nem agütsü, aser tanü item ken o angadanga.

India sorkari Israel nung software Pegasus amshia linük nung yimtenren lenirtem, opposition lenirtem,

osangbenertem aser meimchir temeden atema inyakertem itdangitogo, ta Centre sorkar nem tai tonglokja lir.

Senior journalists- N Ram aser Sashi Kumar na atema jembitsür senior advocate, Kapil Sibal dang Bench-i, 2019 küm nunga Whatsapp ajanga itdangitsü atema Pegasus amshir, ta osang proka liasü, ajsüüka kechiba tang ang iba ken o benoker, ta asüngdang.

Ano temepishiba ken o balaka benokertem atema jembitsür senior advocate, CU Singh-i Bench dang, shirnok anema itdangitar 2019 küm nungbo memeteti liasü, ibayongji tang ang item ken o benoker, ta langzü.

Communist Marxist Party of India (Marxist) nungi MP, John Brittas atema jembitsür, advocate Meenakshi Arora-i, 2019 küm November ita nung Parliament nunga iba onük benoka liasü, iba mapang nungji taoba mapang IT Minister, Ravi Shankar Prasad-i sorkari ozüng alema itdangitba mapa meinyaker ta metetdakja liasü, ta ashi.

Ken o angdanga tenzüklü advocate Kapil Sibal-i, Pegasus ya technology tamajung, iba ya asenoki memeteti asen takümi aiter aser asenok inyaksangshi ajak itdangiter, ta shia liasü.

Paisa Supreme Court Bench dang, "Iba (Pegasus) ya shirnoki alizükar sorkari langzütsüla. Sen kwi agi alizük? Hardware ji kong ayu? Kechiba sorkari FIR mebenok?. Sorkari dang osang

tejangja agütsütetsü," ta metetdakja liasü.

"Iba court nung inyaker registrar kar aser judiciary nung züngsem ka indang phone number tejenba ajanga itdangitba osang tanep ang onoki metet, itemji spyware list nung densema lir. Pegasus ajanga noksa tangokteter aser video-a agiteter. Iba tetezü parnoki kü phone nung aliba camera aser mic ajak amshia ni inyaksangshi ajak itdangitetsü," ta Sibal-i ashi.

Israel nung NSO-i, parnok indang Pegasus ji kiralongra anema raratsü atema Central agencies dang ang ayoker ta shiogo; süra iba tetezü list nung densema alir osangbenertem, shisashirtem, meimchir temeden atema inyakertem aser court nung inyakertem ajakji kiralongrartem lir, ta pai ashi.

Jagdeep Chokkar-ia temepishiba ken o ka benoka liasü, aser pa atema jembitsür senior advocate, Shyam Divan-i, Chokkar ya shisashir ka lir aser pa indang phone-a itdangitogo, ta metetdaksü.

Divyan-isa, "Sorkari pa anema spyware amshio go ta senso kati metetogo, iba ya linük temzüng alema lir. Iba ya sorkari sensotem atema rara ayongzüka lir," ta ashi.

Journalist, SNM Abdi atema jembitsür, senior advocate Rakesh Dwivedi-ia bench dang, forensic examinations ajanga Abdi indang phone ajanga pa itdangitba osang metetdakja liasü.

Paisa, "Iba ya nisung ka kija indang phone itdangitba masü saka nisung aika anema itdangitba ken o lir. Iba ya India sorkari parnok sasa inyak asütsüa akok," ta ashi.

Senior advocate, Arvind Datar-i, "Tanü nisung 300 jungkai adokogo. Nisung 300 asü 3,000'ar Tsüngremi dang meteta lir? Judiciary-i iba ken o magizükra shibai agizüksü? Judiciary-i iba ken o ya agizüksüla aser tim teinyaktsü inyaksüla," ta metetdaksü.

Anogo ana tejaklen Editors' Guild of India-ia Supreme Court dang spyware contract osang sorkar dang meshitsü aser iba ken o bushisüngdangtsü mepishia liasü.



August 05, 2021 nü Mumbai nung healthcare volunteer kati tambur ka nem coronavirus vaccine tutsüba noksa nung angur. Kidang nungi mayazükter shirangertem aser matamabensartem nem ki tonga oa vaccine tutsütsü atema sorkari door to door vaccination campaign tenzüko.

MULUNGNEN O



ASO: 01/01/1944 ASÜ: 31/07/2021

Onoki kanga meima aliba asür I. Sunep Jamir (Süngratsü), asüba anogo 31st July 2021, nü nungi kija, kibong, arogo aser lokdi shirnokisa nübu, rongsen, sarasadem, shisatsü agi ozü kibong den asükhu nung yaritepa aruogo, nenok ajak dang kanga pelaba lemsateper.
Nenok kija taküm, lokti ajak asen teyanglur Tsüngremi moajang ta sarasademtsür.

Temeim Kinungtsü aser Kinungertem.

**Office of the
Molungyimsen Sanglir Kidong Telongjem
Dimapur Unit**

Khonang Tenüngsang Agütsür

CBSE ajanga 2021 küm agiba Class 12 tatidang nung **Sp. Imjungjungshi Sanglir** (Molungyimsen), Wb.Anungba Sanglir aser Wt. Asangla Lkr jabasoi Delhi Public School (DPS) Dimapur nungi 94.4 % nung takok tajung ngutetba asoshi pelaba lemsateper aser Tsüngrem tenüng asanger.

Maneni iba den kaketshir shirnoksa tatidang balala nung takok tajung nguogo nenok ajak nem tenüngsang agütsür. Asen teyanglur Tsüngremi maneni tarutsü nunga nenok azüngba wadang balala nung takok tajung den arishi moajang ta sarasademtsür.



"Kidong tenüng nung"

**Sd/-
Sajung Sanglir
President**

**Sd/-
Tiamongba Sanglir
Gen. Secy.**

J.N. AIER COLLEGE
'C' Khel, 4th Mile Diphupar, Dimapur : Nagaland

**ADMISSION NOTICE FOR
B.A. 1ST SEMESTER 2021**

SUBJECTS OFFERED :

HONOURS : ENGLISH, EDUCATION, SOCIOLOGY, POLITICAL SCIENCE	GENERAL : ENGLISH, EDUCATION, SOCIOLOGY, POLITICAL SCIENCE, HISTORY
---	--

**Admission can be done through
online as well as from the college office**

For online Admission and form visit :
www.jnaiercollege.in

Email : jnaiercollege@gmail.com

For further queries contact :
8731845133/9862610736 ☎ 7005255141

Office Timing : 9:00 A.M to 2:00 P.M on all working days

TENÜNGSANG AGÜTSÜR

Taküm 2021 NBSE ajanga agiba HSLC aser HSSLC tatidang nung Artang Ward nungi kaketshir shirnokisa takok tajung ngutetogo, nenok ajak nem Artang Ward Yimden ajanga tenüngsang den konang tetushi tulu agütsür.

Talisa, Artang Ward nung aliba Straighway Hr. Sec. School nungi Artang nung alir Longsa nung Wb. Jongpongtemshi Longkümer aser Wt. Toshirenla Jamir tena jabaso Sb. Limatongzük Longkümer-i HSLC tatidang nung TOP 11 jenjang ajangzükta konang nüngsang bener arutsüba asoshi tenüngsang agütsür aser Straighway Hr. Sec. School Administrator-i anir tesayur ajak dang pelaba lemsateper.

Iba den külemi Artang Ward nung aliba Nagaland Christian Residential School (NCRS) nungi Ao Subject nung State Subject Topper adoktetsüsa NCRS administrator-i anir tesayur shirnokisa meranga sayuogo, nenok ajak dang pelaba metetdaksür.

Tsüngremi nenok ajak maneni moajang !

**Sd/-
T. Yanger Jamir
Chairman
Artang Ward Mkg**

**Sd/-
T. Ati Mongro
Secretary
Artang Ward Mkg**

Israel-i tayimtsü amshia southern Lebanon amak



Beirut, Lebanon nung rong anendak ki tuluka poksar küm ka ajungba anogomung bilemteta nüburttem iba tesem nung adenshia aliba noksa nung angur. Linük nung rongsenketzüng jenjang kanga mejungi aser yimtenren tsütsü atsütepba ajanga sorkar ka mali küm ka ajungba mapang iba anogomung ya amunger.

Beirut, Luroi/August 05 (Agencies):

Arütsü alema ananü rocket khaloktsüba sülen Israel fighter jet temi kidanger linük, Lebanon nung amaker.

"Tanep (Brehostibarnü) Lebanon nungi Israel litsü nung rocket tem khaloktsü. Iba asoshi telangzüba agüja fighter jet temi Lebanon nungi rocket khaloktsüba tesem aser kiralongra atema amshiba ki-o- jen amak," ta Israel air force ajanga Twitter nung ashi.

"Iba den bendenloksema kasa tesem nungi taoba mapang rocket khaloktsüdak maka liasü." Israel-i aonung sangwa tayimtsü amshia amakba ajanga ozü linük asoshi majung bilemba talila sayur, ta Lebanon Tir Michel Aoun-i ashi.

Tayimtsü amshia amakba ya southern Lebanon indang security aser tashi atema tetsükdaktsü lir aser UN Security Council indang

pangzüng nung aibelener alitsü, ta Aoun-i Twitter nung ashi.

Israel tayimtsütemi mapang shia Gaza nung Palestine telungpur aser Hezbollah telok mesüra Syria nung Iran nunger dak tenük yoker amaker, saka 2014 küm sülen Lebanon nung amakba tang ya mezüngbuba alitsü, ta air force ajanga ashi. Taoba mapang mitkartemi mera balala agiba nung artillery amshia injang tulu aser bomb khaloktsüba liasü.

2006 küm Iran-i nungitba Hezbollah den Israel-i rara liasü, koba southern Lebanon nung tashi tait telok ka liasü. Iba sülen arütsülen süngjema liasü.

Lebanon nung Hezbollah meyong Al-Manar television ajanga ashiba agi, Israel tayimtsü anati arütsü nungi kilometer 11 pilar Mahmoudiya jila tezülen ayatirm nung 12:40 ako (par mapang) meta amak.

Lebanon indang National

News Agency ajanga iba osang ya sangdong, saka osang tejangja kar dang agütsü. Lebanon nungi rocket khaloktsü, ta Israel-i ananü ashir.

Bodhbarnü rocket asem khaloktsü, aser item rongnung ana Israel tonga linük north tsütsü Kiryat Shmona jila anasa tsük, kong nisung pezü 'stress symptoms' anepalua liasü.

Israel mitkar temi iba atema telangzüba agüja artillery shelling round asem khaloktsü, ta ashi. Lebanese army ajanga ashiba agi, Bodhbarnü rocket khaloktsüba sülen Israel-i khaloktsüba artillery shell 92 tashi southern Lebanon nung tsük. Ibaji ajanga tesem kar nung morok mi adoka liasü, saka asü-amaba meliasü.

Ajisüaka tang tashi rocket ya shiri khaloktsüar tang tashi memetet, aser Lebanese army temi bushisüngdangba mapang lir, ta ashi.

Linük 135 nung COVID-19 Delta variant lir

Geneva, Luroi/August 05

(Agencies): COVID-19 süaka kanga mela menatempa aoba tabu ka, Delta ya tang linük 135 nung puteta lir, ta World Health Organization ajanga ashi. Taruba hopta tashinung alima nung coronavirus cases ya million 200 alemtsü, ta parnokisa ashi. Saka linük balala nungi ketdangsürtemi ajanga sangdongba osangtem AFP ajanga bendenba nungbo cases million 200 ya alemogo.

WHO ajanga August 3, 2021 nü sangdongba Covid-19 Weekly Epidemiological Update ajanga ashiba agi, alima nung linük 132 nung COVID-19 Beta tabu ya jangjateta lir aser linük 81 nung Gamma tabu ya jangjateta lir. Alpha variant ya linük 182 nung jangjateta lir aser Delta variant ya linük 135 nung puteta lir, koba India nung mezüng jangjateta liasü.

Ita ka dak tema alima nung COVID-19 cases tasen ya talila puteta arur, aser taoba hopta - July 26 nungi August 1 - tsüngta cases million 4 dak tema liasü, ta sangdong ajanga ashi.

Tang iba tashidak menatempa aoba ya kanga sashia akumer, talisa kanga mela menatempa aoba Delta variant ya ajanga lir, saka nisung asüba tsütsü tera tenemba renloker, ta AFP data ajanga sayur.

Ibai talisa Eastern Mediterranean aser Western Pacific Regions nung tali puteta ajanga lir, kong tesüiba hopta den medemdangra shilem 37 aser 33 agi timba akum, aser South-East Asia Region nung shilem 9 agi tali liasü. Taoba hopta den medemdangra tan hopta asüba shilem 8 agi tajemba liasü, aser iba mapang alima nung COVID-19 agi nisung 64,000 dak tema asü.

Nisung asüba atema tesüiba hopta den medemdangra Western Pacific aser Eastern Mediterranean Region nung shilem 48 aser 31 agi timba liasü. Alima nung tang tashinung COVID-19 tashidak ya nisung million 197 jungnüa dak jangjateta lir aser asüba ya

million 4.2 alitsü.

Kasa yimya nungya aonungbo alima nung COVID-19 cases ya taruba hopta tashinung million 200 alemtsü, ta WHO ajanga ashi.

Linük shia asadangba nung taoba hopta COVID-19 cases timtiba ya United States (cases tasen 543,420; shilem 9 renlokba), India (cases tasen 283,923; shilem 7 renlokba), Indonesia (cases tasen 273,891; sholem 5 ajemba), Brazil (cases tasen 247,830; shilem 24 ajemba) aser Iran (cases tasen 206,722; shilem 27 renlokba) alitsü.

South-East Asia region nung taoba hopta (cases 841,000 dak tema) den medemdangra cases tasen ya shilem 9 agi tali liasü, saka hopta shia nisung asüba yabo taoba hopta (22,000 asüba) den kasa shi liasü.

Iba region nung cases tasen ya timtibaji India (cases tasen 283,923; nisung 100,000 nungi cases tasen 20.6; shilem 7 renlok), Indonesia (cases tasen 273,981; nisung 100,000 nungi cases tasen 100.1; shilem 5 tajemba), Thailand (cases tasen 118,012; nisung 100,000 nungi cases tasen 169.1; shilem 26 renlokba) alitsü.

Iba region nung cases tasen putetba ya shilem 80 bo India, Indonesia aser Thailand nungi alitsü. Nisung tasen asüba ya timtiba Indonesia (tasen asüba 12,444; nisung 100,000 nungi nisung 4.5 asüba; shilem 28 renlokba), India (Nisung tasen asüba 3,800; nisung 100,000 nungi nisung ka dang tajemba asüba, shilem 45 agi ajemba) aser Myanmar (nisung tasen asüba 2620; nisung 100,000 nungi nisung 4.8 asüba; shilem 24 renlokba) alitsü.

Delta varian timba küma mozü agiba tsütsü tim-tesü ka melitetba mapang WHO ajanga September ita tatem tashi COVID-19 mozü tali agütsütsü ajungshir aser sensaker aser takar linüktem nung mozü agütsüba tetsüngta tulu lir, ta ashir.

(Maneni tapak 10 nung...)

Tanzania opposition lenir court ken o thinen; longkak aiter apu

Dar es Salaam, Luroi/August 05 (Agencies):

Tanzania nung pua aliba opposition lenir Freeman Mbowe busema longkak aiter kar riot police-i apu, aser pa anema kiralongraba ken o benoka aliba jembitsü anogo thinen, ta par party ajanga ashi.

Constitution melenshitsü asoshi takhangba agüja mungdang ka amungtsü lia Mbowe aser par Chadema party nungi lenirtem taoba ita pua liasü.

Arishi küm 59 tain Mbowe anema kiralongrar nem senotsü teyari agütsüba aser tasa tamajung yangluba ken o benoka lir aser Dar es Salaam nung tepuokdak ka nung yua lir.

Mbowe ya okadak Brehostibarnü video link ka ajanga nokdaktsü liasü, sana connection timtem kar ajanga Hokulbarnü thinen, ta pa asoshi okatsür Peter Kibatata-i ashi. Mbowe ya Hokulbarnü okadaki anir arutsü imlar.

Chadema party busemertemi court kima "Mbowe ya kiralongrar masü" aser "Freeman Mbowe chiokang" ta zülua bener

adenshia liasü.

Iba mapang police temi longkak aiter apu, ta party ajanga Twitter nung ashi. Police temi nisung kwi apuar ano mejangjateti lir.

Mbowe anema kiralongra ken o benokba ya Mwanza nung constitution indang jembishinütsü senden ayongba dak sendakba masü saka Tanzania tesem danga nung taoba küm aibelen mapa inyakba atema lir, ta state prosecutor temi ashir.

John Magufuli ajunbena sür pa melen tir inyaktsü Samia Suluhu Hassan shimer ita pezü lir Mbowe ya apu. Samia Suluhu Hassan ya Tanzania nung tetsürtem rongnungi tir mezüngbuba alitsü.

"Bulldozer" nüngja agüja alisang, Magufuli melenba sülen Hassan yagi nisung ka kijai yimsü asüba yimya melenshitsü teimla liasü.

Mbowe apuba atema United States ketdangsür kati Bodhbarnü tebilemstü lemsatempa liasü.

"Opposition lenir Mbowe apuba aser tepuokdak ayuba atema onoki süoki ia bilemba

lemsatepogo," ta Victoria Nuland, Under Secretary of State for Political Affairs ajanga osangbener dang ashi.

Nuland ya African linük kar semdanga senzür tatemsa Tanzania semdanga Tir Hassan aser Tanzania foreign minister aser opposition lenirtem ajuruba sülen lai osangbener dang iba o ya shia liasü.

GOVERNMENT OF NAGALAND DIRECTORATE OF EMPLOYMENT, SKILL DEVELOPMENT & ENTREPRENEURSHIP NAGALAND: KOHIMA

GOVT.ITI SELECTION RESULT

Dated Kohima the 5th Aug' 2021

NO.DET-2/14/2001 (PT-1)/412

Selected list of candidates for undergoing training at various Govt. ITIs for the academic session 2021-2022/23 is hereby declared. Candidates may check the result from the office of the respective Govt. ITI.

N.B:

1. Date of Admission starts from **06/08/2021 to 13/08/2021**. No further admission will be entertained after the expiry of last date.
2. Date of commencement of Class/Training will be notified through the office of the concerned Principal / Vice Principal.
3. Admission fee = **Rs. 2,100/-**
4. Caution Money = **Rs. 1000/-** (refundable after the successful completion of Training).
5. Original Documents to be produced at the time of admission.

Sd/-
CHIDEN YADEN
Director

Issued by DIPR

Livingstone Foundation International

Affiliated to CBSE & Cambridge International

Thahekhu / Kevijau, Dimapur-797112 : Nagaland

☎ : (03862) 244203 (O) +917005996093 / 92

E-mail : livingstone.nagaland@gmail.com

Website : livingstonenagaland.com



Congratulations Stonites for excelling in your academics.
Remember learning is a life long process. It's an all round development & not just limited to your grades & marks.

Total Appeared in ARTS / SCIENCE / COM.	1st Division	2nd Division	3rd Division	Total Distinction
135	110	25	NIL	118

STONITE ACHIEVERS

LFI NEW COLLEGE ADMISSION

Open for both Boys & Girls 2021-22 Session

Forms are available at the LFI School Office Timing : 9:00am to 3:00pm.

College Admisison Fees for both Arts & Commerce 5000/- per semester

Installments for 1st Semester
1. General (Arts & Coms) 1,200/- per month
2. Arts & Coms (Hons) 1,500/- per month.

SCHOLARSHIP PROGRAMME

- * 100% Concession in Monthly installments for Top 3 Rank Holders from all recognised Boards.
- * 50% Concession in Monthly installments to other toppers from all recognised boards.
- * 50% Concession in Monthly Installments for students with excellent fair in Sports, Arts, Music & Other such skills.
- * 50% Concession for those students who have lost their parents to COVID-19

Limited Hostel Seats are Available for both Boys & Girls

COLLEGE FACULTY



Dr.R.K.Behera
Qualification: M.A., Ph.D
Recipient of Governor gold medal 2015



Dr. Tainla Mar
M.A. (Ph.D) NET
Gold Medalist (NU)



Imsulemla
M.Com, NET
Ph.D. (Pursuing)



Sashirenla Mollier
M.A. (Psy & Socio) NET
Ph.D. (Pursuing)



L. Achilo Kikon Panmei
M.A. (Pol.Sc) NET



Mhayano A. Odyuo
M.A. (His & Arch.)
NET



Jemsungba Walling
M.A. (Ling) NET
M.A. (Comp. Ling)



Renemzungla
M.Com & NET



Viphirianuo Seyie
M.A. (Eng) NET

Tokyo Olympics: India nungger teburtemi hockey nung bronze jenjang angu

Tokyo, Luroi/August 05, 2021 (Agencies): Küm 41 sülen, tang asaya aliba Tokyo Olympics nung India tebur hockey team-i otsüsüsüsü Olympic nung tasembuba takok jenjang nguogo. Brehostibarnü, tebur hockey tasembuba jenjang atema India aser Germany na asaya liasü aser India team-i goal 5-4 agi Germany tsükdaktsü.

Taoba asayamung balala nung gold medal 8ben tashi takok angur India team-i tesüiba küm 40 tashi Olympic nung medal menguteti arur sülen taküm Olympics nung parnoki medal angutsü nükla yur meranga asayaogo.

Tang World no. 3 nung alir India team atema Simranjeet Singh-i minute 17buba aser 34buba nung goal ana idakja liasü. Ano, külem team pur Hardik Singh (27th), Harmanpreet Singh (29th) aser Rupinder Pal Singh (31st) nungger goal ka ka idaktsü.

Kasa asaya nung Germany team atema Timur Oruz (2nd), Niklas Wellen (24th), Benedikt Furk (25th) aser Lukas Windfeder (48th) nunggeri goal ka ka idaktsü.

Medal angutsü temulungtetba tulu yur, India hockey putiotsü nung otsüsüsüsü, tan Olympics nung



Tokyo, Luroi/August 05, 2021: Brehostibarnü, Tokyo 2020 Summer Olympics - tebur hockey bronze medal match nung India tebur hockey team-i Germany madak goal 5-4 agi takok anguba sülen, coach Graham Reid aser asayartem külemi tangokba noksa ka yangi angur.

India tebur hockey team-i bendanga agütsür shilem agiba nguogo. Parnoki Germany akoktsü atema goal ana shi nüngdaka liasü aser team-i kanga dang meranga goal ana ya ngutet.

Olympics asayamung nung, India hockey team-i bronze medal tasembuba takok angur asütsü. 1968 Mexico City aser 1972 Munich Games nung India hockey team-i bronze medal ana tashi koka lir.

World no. 5 nung alir Germany team-i 2016 Rio Games nung bronze medal angu.

India team-i Germany den meneptepa asayatsü asoshi mapang agi aser mezüing quarter nung Germany-i parnok amokbanger asaya liasü. Iba den külemi, asaya tenzükli nungi Germany-i India team pur defence azüokteta asaya aser minute 2buba nung Oruz-i mezüing goal idaktsü.

Minute 5buba nung India-i penalty corner ka angu, saka goal meinoktsütet. Minute 5 sülen, Germany atema Mats Grambusch-i goal tanabuba idaktsütsü merang, saka goalkeeper PR Sreejesh-i kanga

dang junga nokdangtet.

Germany puri India defence tsütsü amokbanga asayaba den mezüing quarter tembangtsü lia parnoki penalty corner 4 tashi angu, saka India team-i item penalty corner ajak nokdanga asaya.

Tanabuba quarter nung Manpreet'er teloki tasa melenshia aser kara asayatsü tenzüik. Iba mapang, midfield nungi Nilakanta Sharma-i yokba ball ka Simranjeet-i agizüka India atema mezüing goal idaktsü.

Minute 2 sülen, Germany-ia telangzüba agüja Florian Fuchs-i goal idaktsütsü merang, saka Sreejesh-isa iba goal nokdang. India pur defence tsütsü tashimaitba asadangteta, Germany-i maongka agi aser minute 2 tsüingda parnoki goal ana tashi atonga idakja liasü.

Linük 135 nung COVID-19... (Tapak 8 nungi...)

Takar linüktem nung nisung 100 nungi doses ya nisung 100 jungnüa nem agütsüogo saka sensaker linüktem nungbo nisung 100 nungi doses ya nisung 1.5 shi nem dang agüja lir, aser ibaji talisa mozü manguba ajanga lir, ta WHO Director-General Tedros Adhanom Ghebreyesus-i Bodhbarnü osangbener senden ka nung ashi.

Takar linüktem dangi mozü timba aoba ya arrsanga melener sensaker linüktem dangi aotsüla, ta pai ashi. Yamaji WHO ajanga September ita tatem tashinung linük shia nütsüing yongsük shilem 10 bo mozü agitettsü ajungshir, ta WHO tekolakbai ashi.

WHO indang nükjidongji September ita tatem tashinung nütsüing yongsük shilem 10 bosa mozü agütsütsü atema linük

ajunga yaritsü ya lir, küm tatem tashinung shilem tajemba agi 40 aser taruba küm tiyong tashinung shilem 70 agitettsü nükjidong lir.

September ita tatem tashi booster shots soita atatsü asoshi Olympic athletes, investor, business tsütsü lenirtem, tamangba yimsü lenirtem aser kibong nung nisung ajaki nokdaktsü ajungshir, ta ashi.

Tang tashinung alima nung COVID-19 mozü ya doses billion pezü dak tema agütsüogo aser itemji shilem 80 dak tema taka-tait linüktemi ao, saka parnok ya alima nütsüing yongsük tesadang ka dang nungi tajemba lir.

Nisung million aika dose mezüingbuba agitsü atatepa aliba mapang takar linüktem nung booster dose agiteper, ta Ghebreyesus-i ashi.

Tokyo Olympics: Ravi Dahiya-i silver medal angu

Chiba, (Japan), Luroi/August 05, 2021 (Agencies): Brehostibarnü, Tokyo Olympics nung 'men's freestyle 57kg' title atema India nungger wrestler Ravi Dahiya aser world champion Russia nungger Zavur Uguev na toktepa liasü. Iba tetoktepa nung Ravi-i 4-7 agi Uguev makokba sülen, pai silver medal nguogo.

Olympics nung India contingent nungi takok angur (Gold medal) tanubusang rongnung arishi küm 23 tain Dahiya akümtsü ta imlaa liasü, saka Uguev-i ayong ayonga Dahiya tsükdaktsü.

2019 World Championship

asayamung nunga Dahiya-i Uguev makok.

Tokyo Olympics - tebur freestyle 57kg tetoktepa nung, Haryana kübok Nahri yimtsüing nungi wrestler, Ravi-i mezüing round nung Colombia nungger Tigreros Urbano madak 13-2 agi akok. Iba sülen, quarter final nunga Ravi-i Bulgaria nungger Georgi Valentinov Vangelov madak 14-4 agi koka liasü.

Semifinal nung Ravi-i Nurislam Sanayev tsükdaktsür sülen pa final tongtet.

Sushil Kumar, shiba nisung tepsetba ken o dak sendakba nung tepuokdak lir, Olympics final tongteter India wrestler rongnung pa asütsü. 2012

London Games nung pai silver medal takok angu aser kasa asayamung nung külem India nungger Yogeshwar Dutt-i bronze medal ngutet. 2008 Beijing Games nunga Sushil-i bronze medal koka lir.

Ravi densema, Olympic asayamung balala nung, India nungger wrestler pungo agi Olympic medal takok angur asütsü.

1952 Helsinki Games nung, KD Jadhav-i bronze medal takok angu. 2016 Rio Olympic Games nung, Sakshi Malik-i bronze medal takok anguba mapang, Olympic medal takok angur India tsür wrestler rongnung la mezüing aküm.

T20 World Cup aser Ashes nung Archer masayatsü

Nottingham, Luroi/August 05, 2021 (Agencies): England nungger fast bowler Jofra Archer tekatsü yiruba ajanga taruba Twenty20 World Cup aser Ashes series (Australia) nung pa masayatetsü, ta Brehostibarnü, England & Wales Cricket Board (ECB)-i sangdong ka ajanga metetdaktsü.

ECB-i ashiba agi, taoba hopta arishi küm 26 tain Archer achiji tekatsü scan agia liasü aser tanaben raksar aliba ngutet.

"Iba scan osang asadanger

sülen, taküm tanüingba asayamung nungi Archer agienogo aser tang India team den tasayadak aliba LV= Insurance Test series, taruba ICC Men's T20 World Cup 2021 aser Ashes series nung pai shilem magitsü," ta ECB sangdong nung shia lir.

2019 World Cup nung England atema Archer-i tongti shilem agiogo aser Sussex Club nungi asayasang, Archer-i England team atema T20 World Cup aser Ashes nung asayar tongti ka ama shilem agitsü imlaa liasü.

2019-2020 South Africa tour temer sülen, Archer teka nung timtem adoka liasü. Taküm England aser India asayaba mapang nungi Archer-i cortisone injection agia arudar.

Bodhbarnü, Trent Bridge nung India aser England na tsüingda asaya tenzüikba Test series nung, team nung Archer asayatsü imlaa liasü, saka Sussex atema pai asaya ana nung dang shilem agiba sülen asaya nungi pa tukadokba ajanga tebilemtsü adoker. Asaya ana densema Archer-i over 9 dang ona liasü.

BILEMDANGANG

"Asüküm shisatsüi tarutsü lenmangtem shibangtsür."